



莊子卷三

莊子內篇大宗師第六

大宗師者道也猶言聖法
天天法道道法自然也

知天之所為知人之所為者至矣知天之所為者天而生也知人之所為者以其知之所知以養其知之所不知終其天年而不中道天者是知之盛也雖然有患夫知有所待而後當其所待者特未定也庸詎知吾所謂天之非人乎所謂人之非天乎且有真人而後有真知

宋福清

虞齋

林希逸

註

明同邑

後學

施觀民

校

人之生也凡事皆出於天故曰天所為然身處世間人事有當盡者故曰人所為人事盡而天理見是以其智之所知以養其知之所不知也不役役以傷生故曰終其天年既知天又知人故曰知之盛也此數語甚正雖然有患而下此一轉尤妙知有所待而後當知在我所待者在外或無所求而自得或必有求而後得皆不可得而定當者定也亦當否之當也事既定而後見其當與不當此一字下得最工若以為出於天又必求而後得若以為出於人又有求而不得者此所謂詎知天之非人人之非天也譬如壽夭不貳莫非命也而又曰知命者不立乎巖墻之下便見天所為與人所為不定處莊子看世事寂精此等處當子細玩味必有真人而後有真知此言

何謂真人古之真人不逆寡不雄成不暮士若然者過而弗悔當而不自得也若然者登高不慄入水不濡入火不熱是知之能登假於道也若此

寡不足也不逆順也當不足之時即聽順之功雖成亦不以為誇雄誇也士與事同古字通用如東山詩曰勿士行枚也暮謀也無心而為之故曰不暮事過而弗悔過失也猶今日蹉過也當而不自得當諦當也猶今日恰好也事成也自得自多也凡事或失或成皆委之自然不以失為悔不以成為喜也登高不慄入水不濡入火不熱即無入而不自得也知之能登假於道言其所見深造於道也兩若然者此是莊子筆勢知與智同假也至

古之真人其寢不夢其覺無憂其食不甘其息深深真人之息以踵眾人之息以喉屈服者其嗑言若哇其耆欲深者其天機淺

其寢不夢神定也所謂至人無夢是也其覺無憂者與接為構而不以心闔也其食不甘即無求飽之意禪家所為塞飢瘡是也其息深深真人以踵眾人以喉道書修養之論其原在此神定則其出入之息深深皆自踵

而上至於口鼻所以有數息之法神無所養則其出入之息止於喉間而已靜躁不同體於身者見之哇吐也嗑咽也內無真見言語只在口頭所以易屈服於人此一句看參禪問話者方見得莊子之言有味如所謂蝦蟆禪只跳得一跳便是若哇之易屈服也者慾者人欲也天機者天理也曰深淺者即前輩所謂天理人欲隨分數消長也此一段一句是一條貫道書佛書皆原於此足見此老自得處不可草草讀過惜不見大慧張平叔與之論此

古之真人不知悅生不知惡死其出不訢其入不詎條然而往條然而來而已矣不忘其所始不求其所終受而喜之忘而復之是之謂不以心捐道不以人助天是之謂真人

此一段只說生死出生也入死也條然而往條然而來不忘所始不求所終受而喜忘而復即是生死兩字不訢者不逆也條然隨之之意也不忘所始不求所終即所謂原如要終故知死生之證也或問趙州曰和尚百歲後向那裏去州云火燒過後成一株茅草是不求其歸之無所係念故曰忘而復之不以心捐道即心是道心外無道也不以人助天壽夭有命人力無所加也此十字當子細讀之不捐者不斯須離之意

若然者其心志其容寂其顙頰凄然似秋煖然似春喜怒通四時與物有宜而莫知其極

志者有所歸主而定之意此書字義不可以語孟之法求之前輩云佛氏說性止說得心既曰異端矣又安得以吾書字義求之寂靜也而壁十九年是其容寂處顙大也顙額也頭容直故見其顙頰然凄然怒也煖然喜也無心而喜怒猶四時之春秋也極止處也物事物也隨事而適各得其宜而無一定所止之地即所謂以接而生時其心者也

故聖人之用兵也亡國而不失人心利澤施乎萬世不為
愛人

用兵毒天下也施澤愛天下也皆以無心行之則亡國者亦不怨被其德者亦曰帝力於我何有吾書亦有此意但莊子之筆形容處說得多過當如口澤及萬世而不為仁整萬物而不為義皆是此類

故樂通物非聖人也有親非仁也天時非賢也利害不通
非君子也行名失已非士也亡身不真非役人也若狐不
借務光伯夷叔齊箕子胥餘紀他申徒狄是役人之役適
人之適而不自適其適者也

此數句乃是譏誚聖賢以形容真人之不可及其意蓋謂世無真人不知至道自聖人而下無大無小皆非也樂通物者聖人之心以無一物不得其所為樂也適得所也不任物之窮通而以此為樂不足為聖人矣無心

則無親疎有疎有親有心矣有心則非仁矣順時而動知天時者也賢者以此為能亦非也就利害君子能之未能通利害而為一則君子亦非矣士必為名名實之實為實失已也故曰非士真自然也不知自然而勞苦以喪其身是役於人者非役人者由此皆過當之論故狐不借而下如伯夷叔齊箕子皆遭譏誚以為役於人而失其已者故曰不自適其適其語雖偏其文亦妙狐不借務光胥餘紀他申徒狄皆古之賢者不自適不自得也

古之真人其狀義而不朋若不足而不承與乎其觚而不
堅也張乎其虛而不華也邴邴乎其似喜乎崔乎其不得已
乎濔乎進我色也與乎止我德也厲乎其似世乎擊乎
其未可制也連乎其似好閉也悅乎忘其言也以刑為體
以禮為翼以知為時以德為循以刑為體者綽乎其殺也

以禮為翼者所以行於世也以知為時者不得已於事也
以德為循者言其與有足者至於丘也而人真以為勤行
者也

此一段形容之語儘有溫粹處但說得太頹洞佛書中
多有此類狀容也義而不朋中立而不倚也謙然若不
足而不自卑承者奉承而自卑之意左傳使之副者曰
承與乎容與也觚德之隅也觚而不堅有德之隅而無
圭角也張平舒暢之貌也虛者有若無也不華者實也
那那喜貌似喜而不喜崔下也處世應物有不得已之
意亦猶悶然而後應也瀟聚也充悅之貌其生色也睟
然見於面故曰進我色止我德者即所謂虛室吉祥止
止也與乎自得之貌厲嚴毅之意望之厲然亦與世人
同也而其中實有崔乎不得已之意故曰似世警乎大
之意也無所屈於世故曰未可制好閉不欲開口也連
合也密也方其未言似不欲言及其既言亦若不言故
曰悅乎其忘言也兩句即一意悅乎俯下之貌體本也
翼附也聖人則曰明于五刑以弼五教此則曰以刑為

本而禮為附皆是反說綽乎其殺者雖殺之而綽綽乎
毋忤於我心也行於世以禮徇俗也時乎用知則用知
是不得已而應事也循德者循天德而自然也循乎自
然而無所容力譬如人登山有足行者皆自至人以
為勤勞而後至言不必勤勞其心而行
亦自至也此無容心之喻也立小山也

故其好之一其弗好之一其一也一其不一也一其
一與天為徒其不一與人為徒天與人不相勝也是之謂

真人

一自然也造化也好與弗好即好惡也其一也其一不
一異也好惡之有異同皆不出乎造化之外故曰其一
也一其不一也一人能以好惡為同則知天者也故曰
其一與天為徒若以好惡為異則知人而不知天者故
曰其不一與人為徒以人勝天不可也以天勝人亦不
可也真人則無好無惡無異無同無分於天人但循自
然而已此釋氏所謂有無俱遣老子所謂兩者皆歸之
玄故曰天人不相勝此乃一與不一皆一也一即大宗

也師

死生命也其有夜旦之常天也人之有所不得與皆物之情也彼特以天為父而身猶愛之而况其卓乎人特以有君為愈乎已而身猶死之而况其真乎

死生猶旦夜也易曰通乎晝夜之道而知是也情實也人力所不得而預此則天地萬物之實理也曰命曰天即此實理也此數語蓋以死生之天命發明一與不一之意曰父曰君人世之所尊愛莫大於此而是道之大尤出於君父之上故曰可以為衆父故曰其有真君存焉卓高也不可及也真自然也此語蓋謂人皆知君知父而不知道之為大宗師也

泉涸魚相與處於陸相响以濕相濡以沫不如相忘於江湖與其譽堯而非桀也不如兩忘而化其道夫大塊載我

以形勞我以生佚我以老息我以死故善吾生者乃所以

善吾死也

相响相濡口相向而相濡潤也處陸之相濡不如江湖之相忘喻人處世而有為不若體道而無為也譽堯非桀一句雖若不經此其獨見自得處無桀亦無堯無廢亦無與無善亦無惡無毀亦無譽毀譽廢興善惡皆相待而生與其分別於此不若兩忘而付之自然付之自然如是化之以道也佛家曰是法平等無有高下又曰有無俱遣又曰大道無難惟嫌揀擇皆此意也兩箇泥牛聞入海直到如今無消息一語最佳大塊天地也有形而後有生則不能無勞老而筋力衰則自然安佚矣息者休止也善吾生者全吾身也所謂朝聞道夕死可也矣是也

夫藏舟於壑藏山於澤謂之固矣然而夜半有力者負之而走昧者不知也藏小大有宜猶有所遜若夫藏天下於

天下而不得所遯是恒物之大情也特犯人之形而猶喜之若人之形者萬化而未始有極也其為樂可勝計邪故聖人將遊於物之所不得遯而皆存善天善老善始善終人猶效之又况萬物之所係而一化之所待乎

壑中之舟澤中之山可謂藏之固密而有時平失之夜半有力言造化也負之而走失也言人之為計雖至深密而時有不得自由者所謂打鐵作門限鬼見拍手笑便是昧者不知也小大舟壑山澤也壑之大可以藏舟澤之大可以藏山以大藏小是有宜也遯失也藏天下於天下付之自然也凡在天之下者皆付之於天則無所遯矣萬物之真實處常如此故曰常物之大情也人皆以有形自喜而不知人之一身千變萬化安知其所以止苟能知之則萬物皆備於我天地與我為一其樂可勝計哉聖人游心於自然則無得無喪故曰遊於物之所不得遯而皆存善天善老善始善終造物也善者能也言造物能此人猶效法之况道乎萬物之所繫者道也

此一化之所待者道也此所謂大宗師也說得一節高一節此是莊子之筆勢若聖賢之言則平易而已

夫道有情有信無為無形可傳而不可受可得而不可見自本自根未有天地自古以固存神鬼神帝生天生地在太極之先而不為高在六極之下而不為深先天地生而不為久長於上古而不為老

前段不說道字到此方提起一道字說大宗師也情實也信亦實也無為無下手處也無形無方體也可傳不可受可得不可見此兩句非知道者不知之關尹子有一章發得傳授字甚好自本自根推原其始也推原此道之始則自古未有天地之時此道已存矣是曰無極而太極也鬼造化之迹也帝猶易曰帝出乎震之帝也鬼之與帝所以能神者此道為之天地亦因道而後有故曰生天生地易有太極是生兩儀是也不為高不為深不為久不為老四句發得越痛快六極六合也

豨韋氏得之以挈天地伏戲得之以襲氣母維斗得之終
 古不忒日月得之終古不息堪坏得之以襲崑崙馮夷得
 之以游大川肩吾得之以處大山黃帝得之以登雲天顓
 頊得之以處玄宮禹強得之立乎北極西王母得之坐乎
 少廣莫知其始莫知其終彭祖得之上及有虞下及五伯
 傳說得之以相武丁奄有天下乘東維騎箕尾而比於列
 星

自豨韋氏而下有十三箇得字皆言得此道而後能如
 此也豨韋氏古帝王也挈天地猶言整齊乾坤也氣母
 元氣也襲合陰陽之氣而在我也此又是脩煉家之所
 祖堪坏山神襲崑崙有崑崙也馮夷水神肩吾太山之
 神黃帝登雲天鼎湖之事也玄宮猶今太清真境禹強
 北方之神也少廣神仙之居也入莫知始終八字意同

而句有長短此文法也十三句之中却以日月斗入其
 間又以彭祖傳說證諸其後此是其筆端踰越規矩處
 不可以聖賢之書律
 之當另作一眼看

南伯子葵問乎女偶曰子之年長矣而色若孺子何也曰
 吾聞道矣南伯子葵曰可得學耶曰惡惡可子非其人也
 夫卞梁倚有聖人之才而無聖人之道我有聖人之道而
 無聖人之才吾欲以教之庶幾其果為聖人乎不然以聖
 人之道告聖人之才亦易矣吾猶守而告之參日而後能
 外天下已外天下矣吾又守之七日而後能外物已外物
 矣吾又守之九日而後能外生已外生矣而後能朝徹朝
 徹而後能見獨見獨而後能無古今無古今而後能入於

不死不生殺生者不死生生者不生其為物無不將也無不迎也無不毀也無不成也其名為撻寧撻寧也者撻而後成者也南伯子葵日子獨惡乎聞之曰聞諸副墨之子副墨之子聞諸洛誦之孫洛誦之孫聞之瞻明瞻明聞之聶許聶許聞之需役需役聞之於謳於謳聞之玄冥玄冥聞之參寥參寥聞之疑始

子葵子綦皆是寓言年長而有孺子之色此今脩煉家之說聖人之才聖人之道如此分別兩句極佳非莊子不能道前此未有也道與才俱全五帝三王之外伊尹周公孔子而已三日七日九日不必強分解不過謂一節高一節耳外生者遺其身也朝徹者胸中朗然如在天平且澄徹之氣也見獨者自見而人不見也無古今則無死生又把殺生字說不死生生字說不生此其筆端鼓舞之常法言雖殺之而不為死生之而不為生也

撻寧撻寧也者撻而後成此名也九箇聞字真是奇絕副墨文字也因有言而後書之簡冊故曰副墨形之言正也書之墨副也洛誦者苞絡而誦之也依文而讀背文而誦猶子生孫故下子孫兩字瞻者見也見徹而曰瞻明聶與囉同以言自許故曰聶許役者行使也需待也可以待時而行使也故曰需役於謳者言之不足而咏歌之也於嗟嘆也言其自得之樂也凡此數句謂道是讀書而後有得做出許多名字也是奇特到了却歸之造物玄冥有氣之始參寥無名之始疑始又是無始之始即所謂有始也者有未始有始也者有未始有夫未始有始也者此意蓋言道雖得之於文字實吾性天之所自有者也

子祀子輿子犁子來四人相與語曰孰能以無為首以生為脊以死為尻孰知死生存亡之一體者吾與之友矣四人相視而笑莫逆於心遂相與為友俄而子輿有病子祀

往問之曰偉哉夫造物者將以予爲此拘拘也曲僂發背
上有五管願隱於齊肩高於頂句贅指天陰陽之氣有沴
其心間而無事跼躩而鑑于井曰嗟乎夫造物者又將以
予爲此拘拘也子祀曰女惡之乎曰亡予何惡浸假而化
予之左臂以爲雞子因以求時夜浸假而化予之右臂以
爲彈子因以求鴉炙浸假而化予之尻以爲輪以神爲馬
予因而乘之豈更駕哉且夫得者時也失者順也安時而
處順哀樂不能入也此古之所謂縣解也而不能自解者
物有結之且夫物不勝天久矣吾又何惡焉

首脊尻只是首尾始終之意無者自無而後有也既有
有而後有生死也莫逆於心心皆自悟而相契相順也

偉哉造物者言造化之大也拘拘者病之狀也曲僂曲
身貌發背瘡也五管瘡之發處也願下而隱於齊肩聳
而高於頂皆形容其病軀之狀句贅贅也指天露頂也
在身陰陽之氣不和而後成病故曰有沴其心間而無
事不以病爲憂也跼躩扶曳而行之貌自照于井而見
其形歎曰使我爲此拘拘者造物也汝惡之乎此子祀
戲問之也假使也浸假也此一段最奇只浸假二字便
自奇特言假使造物漸漸以予之身化而爲他物吾亦
將因而用之此即順造化而無好惡之意是雖寓言亦
自有理得者時失者順即前所謂適來夫子時也適去
夫子順也亦是說死生之理縣解者言其心無所繫着
也苟爲物所着則不能自釋故曰不能自解物有結之
萬物豈能勝天此皆安於自然之意自然之天即大
宗師也樂軒嘗云莊子三十二篇只是自然兩字

俄而子來有病喘喘然將死其妻子環而泣之犁往問之
曰叱避无怛化倚其戶與之語曰偉哉造化又將奚以汝
爲將奚以汝適以汝爲鼠肝乎以汝爲蟲臂乎子來曰父

毋於子東西南北唯命之從陰陽於人不翅於父母彼近
吾死而我不聽我則捍矣彼何罪焉夫大塊載我以形勞
我以生佚我以老息我以死故善吾生者乃所以善吾死
也今大冶鑄金金踊躍曰我且必為鎮鄒大冶必以為不
祥之金今一犯人之形而曰人耳人耳夫造化者必以為
不祥之人今一以天地為大鑪以造化為大冶惡乎往而
不可哉成然寐遽然覺

曾子之易贊其言如許聖賢之學也莊子為此論又自
豪傑叱者呵止之聲避者使其妻子遠去也但驚也謂
其無以哭泣而驚恒將化之人鼠肝蟲臂言至小之物
也便是趙州火燒過後成一株茅草之論但其文奇唯
命之從我不聽則為捍逆亦前段物不能勝天之意鑄
金之喻亦自奇絕賈誼曰陰陽為炭萬物為銅皆自此

中抽繹出金若能言人則必以為恠造物之視人亦猶
大冶之視金此等譬喻非莊子孰能之成安也成然寐
之狀也遽然覺之狀也以生為寐以死為
覺却下六字如此結上一段真文之奇處

子桑戶孟子反子琴張三人相與友曰孰能相與於無相
與相為於無相為孰能登天遊霧撓挑無極相忘以生無
所終窮三人相視而笑莫逆於心遂相與友莫然有間而
子桑戶死未葬孔子聞之使子貢往待事焉或編曲或鼓
琴相和而歌曰嗟來桑戶乎嗟來桑戶乎而已反其真而
我猶為人猗子貢趨而進曰敢問臨尸而歌禮乎二人相
視而笑曰是惡知禮意

相與於無相與相與以無心也相為於無相為無為而
為也撓挑踴躍之意無極無止也登天遊霧遊於物之

外也相忘以生無所終窮即所謂不忘其所始不求其所終也彼言不忘此言相忘則此八字只是不求其所助原襄沐椹也編曲織箔也或編曲或鼓琴指孟子反子琴張而言也猗助語也嗟來歌者發聲之詞也反其真猶言復其初也我猶為人猗便是忽聽上方鍾鼓動又添一日在浮生此等皆其文之奇處禮意猶言禮之本也莊子雖為寓言而禮記所載原壤狸首之歌則知天地之間自古以來有此一等離世絕俗之學今人但云佛至明帝時始入中國不知此等人不待學佛而後也

子貢反以告孔子曰彼何人者邪脩行無有而外其形骸臨尸而歌顏色不變無以命之彼何人者邪孔子曰彼遊方之外者也而丘遊方之內者也外內不相及而丘使女往弔之丘則陋矣彼方且與造物者為人而遊乎天地之

一氣彼以生為附贅縣疣以死為決疣潰癰夫若然者又惡知死生先後之所在假於異物託於同體忘其肝膽遺其耳目反覆終始不知端倪茫然彷徨乎塵垢之外逍遙乎無為之業彼又惡能憤憤然為世俗之禮以觀衆人之耳目哉

脩行無有言無德行也無以命之猶言喚作何人始得方外方內猶今釋氏所謂世間法出世間法也意趣既不同而使汝弔之我則失矣故曰外內不相及而丘使汝往弔之丘則陋矣與造化者為人只是與造物為友遊乎天地之一氣言遊於造物之初附贅縣疣喻此身為天地間長物必決之潰之而後快即勞我以生息我以死之意假於異物便是圓覺地水火風之論四大合而為身故曰託於同體雖肝膽耳目亦不自知即忘身之意也反覆終始不知端倪謂原始要終而不見其初也彷徨浮遊之意茫然無所見知之貌塵垢之外即方

之外也無為之業即自然也憤憤然自昏之貌為世俗之耳目而行禮徒自昏勞此老子禮以強世之意觀者示也

音貫

子貢曰然則夫子何方之依曰丘天之戮民也雖然吾與汝共之子貢曰敢問其方孔子曰魚相造乎水人相造乎道相造乎水者穿池而養給相造乎道者無事而生定故曰魚相忘乎江湖人相忘乎道術子貢曰敢問畸人曰畸人者畸於人而侔於天故曰天之小人人之君子人之君子天之小人也

何方之依者夫子所依行者方外耶方內耶天之戮民即前所謂天刑之而安可解也謂我不得為方外之人也吾與汝共之者欲與之言方外之樂也敢問其方猶問其故也魚相造乎水即相濡以沫不若相忘於江湖

之意穿池而養亦自以為無事也
得亦不拘多少也得道則隨其分量以為生無事也
畸者獨也言獨異之人也侔合也畸則不偶於人而合於天天以為君子則人以為小人人以為君子則天以為小人矣莊子之所謂君子者有譏侮聖賢之意在於其間蓋以禮樂法度皆非出於自然必剖斗折衡使民不爭而後為天之君子也此亦憤世疾邪而有此過高之論

顏回問仲尼曰孟孫才其母死哭泣无涕中心不感居喪不哀无是三者以善喪蓋魯國固有无其實而得其名者乎回壹恠之仲尼曰夫孟孫氏盡之矣進於知矣唯簡之而不得夫已有所簡矣孟孫氏不知所以生不知所以死不知就先不知就後若化為物以待其所不知之化已乎且方將化惡知不化哉方將不化惡知已化哉吾特與汝

其夢未始覺者邪

蓋魯國者以善喪之名高於一國也壹猶常也言其常
恠之也言恠訝之久矣進於知者言其進進而知道也
簡之而不得謂居喪之禮如哭泣之事猶欲簡去而不
得也雖欲簡不得而其所為已為甚簡故曰夫已有所
簡矣不知所以生不知所以死即反覆終始不知端倪
之意就先即始也就後即終也順造化而為萬物故曰
若化為物以待其所不知之化言聽其自然也巳乎助
語也既聽其自然則安知將化已化與不化哉此類皆
其鼓舞發越之語彼既知道能聽其
自然而我乃恠之是我之夢未覺也

且彼有駭形而無損心有且宅而無情死孟孫氏特覺人
哭亦哭是自其所以乃

駭形者形有老少之變也老少之變雖可駭異而其心
閒而無事故曰無損心宅居也且生也死生且夜也知
生之所居者斲則雖死而非實死也故曰無情死情實
也特覺人哭亦哭言隨眾也此是其欲簡而不得之處

是自其所以乃此六字最奇言其自得之妙所以欲簡
不得簡而乃隨眾以哭也此句最難解故數本以上句
乃字與下句且字合為
宜也兩字良可笑也

且也相與吾之耳矣庸詎知吾所謂吾之乎

且也只是且字添一也字前篇中屢有之矣吾者我也
且今之相與既以我而恠之又安知我之所謂我果如
何耶故曰且也相與吾之耳矣庸詎知吾所謂吾之乎
莊子大抵如此鼓舞其文若非別具一隻眼者亦難讀
也

且汝夢為鳥而厲乎天夢為魚而沒於淵不識今之言者
其覺者乎其夢者乎造適不及笑獻笑不及排安排而去
化乃入於寥天一

夢鳥夢魚只是前篇化蝶之意今之言者其覺乎其夢
乎即所謂蝶夢為周乎周夢為蝶乎意有所適有時而

不及笑者言適之甚也亦猶杜詩所謂驚定乃拭淚
樂軒先生亦曰及我能哭驚已定矣此言驚也造適言
喜也驚喜雖異而不及之意同排安排也因物而笑是
物獻笑於我此笑出於自然何待安排故曰獻笑不及
排此排字與下句排字雖同而文勢異不可聯上字說
造物之間事事皆排定死生窮達得喪禍福皆已定矣
我但安其所排隨造化而去乃可以入於造化之妙矣
寥天一只是造化字寥遠也寥天之一即前所謂其好
也一其不好也一之一也又做
成名字如此皆莊子弄筆處

意而子見許由許由曰堯何以資汝意而子曰堯謂我汝
必躬服仁義而明言是非許由曰而奚來為軹夫堯既已
黥汝以仁義而劓汝以是非矣汝將何以遊夫遙蕩恣睢
轉徙之塗幸意而子曰雖然吾願遊於其藩許由曰不然
夫盲者無以與乎眉目顏色之好瞽者無以與乎青黃黼

黻之觀意而子曰夫无莊之失其美據梁之失其力黃帝
之亡其知皆在鑪錘之間耳庸詎知夫造物者之不息我
黥而補我劓使我乘成以隨先生邪許由曰噫未可知也
我為汝言其大畧吾師乎吾師乎鑿萬物而不為義澤及
萬世而不為仁長於上古而不為老覆載天地刻彫衆形
而不為巧此所遊已

資汝者教汝也明言是非辨別是非也為助語也軹亦
助語也奚來為何必來也黥劓點汚汝也猶言汝被他
教壞了遙蕩恣睢轉徙猶前所謂撓挑無極彷徨塵垢
之外之意遙蕩放蕩也恣睢縱橫也轉徙變動也藩者
藩籬也言我不敢求其堂奧且願至於藩籬即是願聞
其畧如此翻下盲者瞽者之喻謂汝無資質不足以聞
道也无莊古之美者也據梁古之勇者也言汝能有道
而化我使美者不知其美勇者不知其勇知者不知其

知去故習而自悟在汝轉移之間故曰皆在鑪錘乘行也成自然之理也去我前日之習而行乎自然以事先生故曰息我黜補我剝使我乘成以隨先生也噫嘆也未可知者言未見得汝便能如此也吾師乎以下數句方是說出箇篇名大宗師字整粉萬物而不可名以義澤及萬世而不可名以仁蓋言無為而為自然而然我無容心故不得以此名之易曰鼓萬物而不與聖人同憂亦是此意長於上古言在天地之先也千古萬古常如此安得以老少名之上而天之所覆日月星辰下而地之所載山川丘陵多少是巧且如天左旋經星貼天而不動日月五星乃右轉或遲或速或流或伏川岩水石多少奇怪皆造物為之衆形之間如百卉羣木多少奇異非巧而何但喚做巧不得凡此數句皆是形容自然之道遊心於自然則見天地與我並生萬物與我為一故曰此所遊已言吾之所遊者如此也

顏回曰回益矣仲尼曰何謂也曰回忘仁義矣曰可矣猶未也他日復見曰回益矣曰何謂也曰回忘禮樂矣曰可矣猶未也

矣猶未也它日復見曰回益矣曰何謂也曰回坐忘矣仲尼蹵然曰何謂坐忘顏回曰墮肢體黜聰明離形去知同於大通此謂坐忘仲尼曰同則無好也化則無常也而果其賢乎丘也請從而後也

此一段借顏子之名以形容造道之妙畢竟莊子在當時亦知顏子之為亞聖也坐忘之說乃莊子之說以此求顏子則誤矣蓋著言有所得也先仁義而後禮樂是以禮樂為高於仁義一節蓋莊子仁義二字只為愛惡凡此字義皆與聖賢不同先忘仁義而又至於忘禮樂亦猶所謂外天下而後萬物也至於坐忘則盡忘之矣此有無俱遣之時所謂今者吾喪我亦是此意四肢耳目皆不自知故曰墮肢體黜聰明離形墮肢體也去知黜聰明也大通即大道也所謂聖者無所不通睿作聖者與道為一也與道為一則無好惡矣無好惡則化矣化則無所住而生其心矣故曰同則無好化則無常請

從而後者言汝更勝於我我反不及而
在汝後矣賢者勝也此賢於人之賢也

子輿與子桑友而淋雨十日子輿曰子桑殆病矣裹飯而
往食之至子桑之門則若歌若哭鼓琴曰父邪母邪天乎
人乎有不任其聲而趨舉其詩焉子輿入曰子之歌詩何
故若是曰吾思夫使我至此極者而弗得也父母豈欲吾
貧哉天無私覆地無私載天地豈私貧我哉求其爲之者
而不得也然而至此極者命也夫

此段只言窮達有命撰出這般說話也是奇絕恐其以
飢而病故曰殆病矣古人彈琴必有歌如舜鼓琴而歌
南風是也若歌若哭者力弱而其聲微也不任其聲者
言無力聲不出也趨舉其詩所謂情溢而其詞蹙是也
歌得不成頭緒故曰趨舉父母豈欲貧我天地豈欲貧
我此數語最精絕求其爲之不得言既非天非地非父

非母則孰爲之然則使我至此極甚者命也此意蓋謂
自然之理在於天地之上命者自然之理也是所謂大
宗師也看莊子此篇便見
列子力命篇不及多矣

內篇應帝王第七

言帝王之道
合應如此也

齧缺問於王倪四問而四不知齧缺因躍而大喜行以告
蒲衣子蒲衣子曰而乃今知之乎有虞氏不及泰氏有虞
氏其猶藏仁以要人亦得人矣而未始出於非人泰氏其
卧徐徐其覺于于一以已爲馬一以已爲牛其知情信其
德甚真而未始入於非人

四問而四以不知答之即維摩經以不言爲不二法門
之意蒲衣或曰即被衣也莊子所言人物名字多是虛

言即鳥有亡是公之類不必致辯蓋缺悟其不言之意故喜以告蒲衣蒲衣曰而乃今知之者言汝于今方悟也而汝也秦氏古帝王也即大庭氏之類藏懷也要結其但能與天為徒也非人即天也故曰未始出於非人未始出猶曰不過如此也不曰天而曰非人皆是其弄奇筆處其卧徐徐安也其覺于于自得也或以已為馬或以已為牛皆置之不問言聽人誰何也其所知皆實理情信皆實也其德在已皆天真也到此處天字又不足以名之是其任自然而然又出於造化之上故曰未始入於非人前曰出後曰入看他下字處帝王之道任自然而已其名篇以應帝王意正在此

肩吾見狂接輿狂接輿曰日中始何以語汝肩吾曰告我君人者以已出經式義度人孰敢不聽而化諸狂接輿曰是欺德也其於治天下也猶涉海鑿河而使蚩負山也夫聖人之治也治外乎正而後行確乎能其事者而已矣且

鳥高飛以避矰弋之害鼯鼠深穴乎神丘之下以避重鑿之患而曾二蟲之无知

肩吾先見日中始後見狂接輿故接輿以此問之經常也式法也義處事之宜也以經式義皆出於已言以身為天下法也度入者化人也以身法而化天下故曰以已出經式義度人經式義句法便與和豫通同度音渡孰敢不聽而化言民皆聽順而化之也欺德者言自欺也非實德也欲以此治天下難於涉海鑿河而使蚩蟲負山也鑿河即是疏九河之類治外者言化之以心則無迹化之以身則有迹也正而後行者順性命之理而行也能其事者盡此自然之事也確乎斷乎也言其為治斷斷乎如此莊子之意主於無為故其說如此所以異於吾儒鳥高飛而避矰繳鼠深穴而避重鑿言有迹者必自累今不能行無為之化而至於有迹是其無知之愚猶不若二蟲也二蟲鳥鼠也神丘猶曰神阜也

天根遊於殷陽至蓼水之上適遭无名人而問焉曰請問

爲天下无名人曰去汝鄙人也何問之不豫也予方將與造物者爲人厭則又乘夫莽眇之鳥以出六極之外而遊无何有之鄉以處墳垠之野汝又何帛音以治天下感予之心爲又復問无名人曰汝遊心於淡合氣於漠順物自然而无容私焉而天下治矣

以爲天下爲問便非無爲而爲之道故以爲鄙人之問而使我不豫不豫者不樂也與造物爲人者言處於人世而順造物之自然也厭足也飽也言遊於人世既已飽足則將遊於造物之外莽眇之鳥虛無之氣也無何有之鄉墳垠之野皆言太虛無極之地也何帛猶何故也注訓法字法亦故也以治天下之問而感觸三之心所以不豫此感字猶言激觸我也帛字崔氏作爲亦是

何故之意淡者恬淡也漠冲漠無形之地也氣猶性也以此心此性皆合於自然故曰遊心於淡合氣於漠前

言無聽之以心而聽之以氣看此氣字便合作性字說

楊子居見老聃曰有人於此嚮疾彊梁物徹䟽明學道不勸如是者可比明王乎老聃曰是於聖人也胥易技係勞形怵心者也且也虎豹之文來田猨狙之便執爨之狗來藉如是者可比明王乎陽子居蹙然曰敢問明王之治老聃曰明王之治功蓋天下而似不自已化貸萬物而民弗

恃有莫舉名使物自喜立乎不測而遊於无有者也

有人於此此言有箇人如此也此數句是不指名而譏侮孔子嚮疾趨走捷疾也強梁剛健也言敏於學而能力

行也物事也徹通也言事事通徹而所見虛明也疏虛也以此而學道不勸可以比明王否言學之為王者事如此可否胥刑徒也易更也猶言卒更也胥易之名必古有此語如漢所謂鬼薪是也技係者以工巧而係累技術之人也此二等入胥易則勞其形技係則怵其心言如此為學身心俱勞是猶胥易技係而已怵心言其心恐恐然也虎豹以皮有文故招來田獵之人藉繩也所以束縛者也糜合作狸狗能執狸與獾狙之便捷可觀皆以招來束縛之禍言有能必自累也執狸字又見天地篇若以有為之學可以為王者事則是虎豹之類亦可比於明王矣此貶之之甚之辭也此三句文自奇功蓋天下而似不自已即功成而不有之意化貸萬物而民弗恃此朝野不知而帝力何加之意貸施也言施化於民也凡字訓釋亦就平仄處呼施字便與施字同義天施地生雲行雨施天施雨施此二字平仄雖殊其義則一有莫舉名者言其所有人莫得而舉名之民無得稱之意使物自喜言我雖無功可名而物自得其樂猶韓文所謂人自得於江湖之外也不測者不可測識也只是无有字立乎不測只是游於无有筆端鼓舞大率如此以上數段皆是說其名篇應帝王之意

鄭有神巫曰季咸知人之死生存亡禍福壽夭期以歲月旬日若神鄭人見之皆棄而走列子見之而心醉歸以告壺子曰始吾以夫子之道為至矣則又有至焉者矣壺子曰吾與汝既其文未既其實而固得道與衆雌而無雄而又奚卵焉而以道與世亢必信夫故使人得而相汝

歲月旬日或遠或近神巫相者也其言皆驗若神棄之而走者畏其言之驗也心醉者心服也既其文盡其外也未既其實未盡其內也而汝也汝未嘗盡見其實固以為能得道乎固字有未得謂得之意當以語勢思之有雌雄而後有所生卵生也無雄又奚卵言無心則無迹也此一句是喻其心未能化故可以形見之意亢高也自以其道為高於世而欲人必信之此便是有迹處便是未化處故神巫得以相汝

嘗試與來以予示之明日列子與之見壺子出而謂列子

曰嘻子之先生死矣弗活矣不以旬數矣吾見恠焉見濕
灰焉列子入泣涕沾襟以告壺子壺子曰鄉吾示之以地
文萌乎不震不正是殆見吾杜德機也

濕灰者言其生氣將盡如灰已濕而欲滅也地文者此
猶禪家脩觀之名萌乎若生而不生之意不震者不動
也不正者不可指定言也此不正字便與孟子必有事
焉而勿正同惟有若萌動而又不動故神巫以為濕灰
灰活火也濕灰則是活火欲滅之意杜德機亦是脩觀
之名德機生意也杜閉也閉其機而不動故有生意欲
滅之狀季咸遂
以為弗活矣

嘗又與來明日又與之見壺子出而謂列子曰幸矣子之
先生遇我也有瘳矣全然有生矣吾見其杜權矣列子入
以告壺子壺子曰鄉吾示之以天壤名實不入而機發於

踵是殆見吾善者機也

杜權不動之動也權與機同但機微而權則露矣於杜
閉之中而動機已露故季咸以為全然有生意也天壤
亦是觀名天田也天上之田非壤之壤即自然之壤也
猶今脩養家以舌間為天津以頂上為泥丸之類此是
生意萌動而上之意名實不入即是有無俱遣機發於
踵言其氣自下而上微而不可見故曰機善者機猶言
性之動
處也

嘗又與來明日又與之見壺子出而謂列子曰子之先生
不齊吾無得而相焉試齊且復相之列子入以告壺子壺
子曰吾鄉示以太冲莫勝是殆見吾衡氣機也

太冲莫勝亦觀名也太冲太虚也莫勝不可捉摸也衡
者平也半也氣機之動至於衡平一半之地而止則是
半動半靜也神巫以為不齊
言其半動半靜而不定也

鯢桓之審為淵止水之審為淵流水之審為淵淵有九名
此處二焉

鯢桓止水流水皆是觀名今佛家以為觀而古人以為淵淵有九名猶今觀音十二觀也審信也言鯢桓信乎為一觀止水信乎為一觀流水信乎為一觀壺子到此方說出向者所以示神巫者皆此淵也我有九淵而方示其三言我之妙處猶有未盡者審字作蟠非列子九淵之名皆全洪野處謂列子勝於莊子恐未為的論若此九淵皆說盡則不得為奇文矣可盡不盡正是莊子之奇處精論文者方知之此章本有四節就此說淵九名一項却入第四節文章伸縮之法也

嘗又與來明日又與之見壺子立未定自失而走壺子曰追之列子追之不及反以報壺子曰已滅矣已失矣吾弗及已壺子曰鄉吾示之以未始出吾宗吾與之虛而委蛇

不知其誰何因以為茅靡因以為波流故逃也

已滅已失言不可見也未始出吾宗亦是觀名虛虛無也委蛇順也若無物若有物不知其如何故曰不知其誰何也茅音願茅靡者拉扱也波流者莽蕩也言其看我不出但見拉扱莽蕩故自失而走也

然後列子自以為未始學而歸三年不出為其妻爨食豕如食人於事無與親彫琢復朴塊然獨以其形立紛而封哉一以是終

為其妻爨代其妻執爨於鼎竈之間而不出也食豕如食人言集神於內而不見其外也於事無與親者言其雖為事而不自知若不親為之也彫琢其聰明而歸復於朴即前所謂墮枝體黜聰明也塊然獨以其形立猶木偶人也封有廉隅也紛多也其形已如木偶安有封畛廉隅之多乎一以是終者言其終身常如此也一常如此之意

無為名尸無為謀府無為事任無為知主體盡無窮而遊
無朕盡其所受乎天而無見得亦虛而已至人之用心若
鏡不將不迎應而不藏故能勝物而不傷

莊子於此又說盡無為而為之事尸主也不以名為主
是為善無近名也府聚也前言不暮事不謀焉用智即
是此意有意於謀則是謀聚於此可謀則謀無所用心
故曰無為謀府事雖不可不為而不以事自任故曰無
為事任人雖不能無智而不以智為主故曰無為知主
心有所主則私矣此四箇無字是教人禁止之意與論
語四勿字同體察也見也見道至於盡而無窮極而心
遊於無物之始故曰體盡無窮而遊無朕朕兆也始也
無朕即無始也天之受我以是理吾能盡之又不自以
為有得故曰盡其所受於天而無見得見其有得則近
於迹矣佛經所謂依幻說覺亦復如是便是此意鋪說
至此以一虛字結之此一句甚有力虛即自然也無所
着也鏡之於物妍媸去來照者自照何嘗將之何嘗迎
之將送也照形而見形照物而見物謂之應

留之故曰應而不藏至人之心如此所以於物皆無所
忤故曰勝物而不傷天道不爭而善勝便是此勝字若
鏡數句分明是解上面一虛字文勢起伏豈
不奇哉平淡之中自有神巧此等文字也
南海之帝為儵北海之帝為忽中央之帝為渾沌儵與忽
時相與遇於渾沌之地渾沌待之甚善儵與忽謀報渾沌
之德曰人皆有七竅以視聽食息此獨無有嘗試鑿之曰
鑿一竅七日而渾沌死

此段只言聰明能為身累故如此形容墮枝體黜聰明
則為渾沌矣本平常說話粧出日鑿一竅之說皆奇
筆也儵忽渾沌皆是寓言不可泥着泥着則為癡人前
說夢矣渾沌即元氣也人身皆有七竅如赤子之初耳
目鼻舌雖具而未有知識是渾沌之全也知識稍萌則
有喜怒好惡是竅鑿矣孟子曰大人不失赤子之心便
是渾沌不鑿也莊子離說得來便如此說惟但文亦奇
矣莊子三十二篇分為內外內篇有七皆以三字名

之自駢拇而下則只擦篇頭兩字或三字為名如學而為政之例其書本無精粗內篇外篇皆是一樣說話特地如此亦是鼓舞萬世之意但外篇文字間有長枝大葉處或以為內篇文精外篇文粗不然也又有以七篇之名次第而說如曰先能逍遙遊而後可以齊物論既能齊物又當自養其身故以養生主繼之既盡養生之事而後游於世間故以人間世繼之遊於世間使人皆歸向於我故以德充符繼之內德既充而符應於外也人師於我而我自以道為師故以大宗師繼之既有此道則可以為帝王之師故以應帝王繼之雖其說亦通但如此拘牽無甚義理却與易之序卦不同善讀莊子却不在此但看得中間文字筆勢出自無窮快活文字最看歸結處如上七篇篇篇結得別道遙遊之有用無用齊物論之夢蝶物化養生主之火傳也德充符之以堅白鳴人間世之命也夫自是箇箇有意到七篇都盡却粧撰儻忽渾沌一段乃結之曰七日而渾沌死看他如此機軸豈不奇特中庸一篇起以天命之謂性三句結以上天之載無聲無臭至矣此亦是文字機軸但人不如如此看得破耳向侍先師講春秋至西狩獲麟先師曰及其至也聖人有所不知所以絕筆於此

是夜散行西軒廊間忽問曰今日獲麟處看得如何希逸應曰以中庸聖人所不知之結斷之諸家所未有也但經始於王正月終於西狩獲麟當時下面若更有一句夫子亦必不書矣先師曰如何希逸曰如此歸結一句更如何添得先師不答而出已夜深矣即扣伯已丘丈之門曰肅翁春秋讀得甚好某與朋友讀春秋許多年未有如此見解者言之喜甚至半夜方歸後兩日伯已丘丈與希逸言之

外篇駢拇第八

駢拇枝指出乎性哉而侈於德附贅縣疣出乎形哉而侈於性多方乎仁義而用之者列於五藏哉而非道德之正也是故駢於足者連無用之肉也枝於手者樹無用之指也多方駢枝於五藏之情者淫僻於仁義之行而多方於聰明之用也

拇定大指也指手指也駢合也枝旁生也與生俱生曰性人所同得曰德駢拇枝指皆病也本出於自然比人所同得者則為侈矣侈剩也似此性德字義皆與聖賢稍異附贅縣疣亦病也駢枝則生而有之贅疣生於有形之後故曰出於形而侈於性多方多端也用之於外也列於五藏哉言非出於內也非道之自然故曰非道德之正告子言義外莊子則併以仁為外矣以仁義為淫僻而與聰明並言皆以為非務內之學故但見其多事多方猶多事也

是故駢於明者亂五色淫文章青黃黼黻之煌煌非乎而離朱是已多於聰者亂五聲淫六律金石絲竹黃鍾大呂之聲非乎而師曠是已枝於仁者擢德塞性以收名聲使天下簧鼓以奉不及之法非乎而魯史是已駢於辯者纍瓦結繩竄句遊心於堅白同異之間而敝跬譽無用之言

非乎而楊墨是已故此皆多駢旁枝之道非天下之至正也

五色文章青黃黼黻古者以養目而莊子以為亂淫故曰駢於明即老子五色令人目盲之意離朱明者也若以為非乎而用明之人則以為是矣故曰非乎而離朱是已多於聰意亦然蓋以禮樂為外物也擢抽也塞猶言茅塞也德性本靜而強於為仁是擢德而塞性也法禮法也不及者人所難及也使人行難行之法故曰使天下簧鼓以奉不及之法簧鼓以言語簧惑鼓動之也以瓦而繫以繩而結事之無益者辯者之多言連牽不已纍疊無窮而無意味故以纍瓦結繩比之竄定猶言脩改也脩改其言句以為辯故曰竄句遊心於堅白同異之間敝勞也跬音企躡趾也其言皆無用而稱譽自喜徒自勞苦故曰敝跬以譽無用之言若以為非乎而楊墨之徒則以為是矣多駢旁枝猶言餘剩也自然之道本無多端此皆餘剩之事非至正也至正者本然之理也

彼正正者不失其性命之情故合者不為駢而枝者不為
歧長者不為有餘短者不為不足是故鳧脰雖短續之則
憂鶴脰雖長斷之則悲故性長非所斷性短非所續無所
去憂也意仁義其非人情乎彼仁義何其多憂也

正正者猶言自然而然而然也自然而然而然則不失其性命之
實理雖合而不為駢雖枝而不為歧雖長而不為有餘
雖短而不為不足此數句極有味即前所謂天下莫大
於秋毫之末而泰山為小也歧起也也有所歧則不平貼
不平貼則不自在看他這般下字豈苟然哉性長性短
言長短出於本然之性也長短性所安無憂可去也鳧
鶴之喻最佳意與噫同歎也以鳧鶴二端言之則仁義
多端非人情矣故嘆而言之使仁義出於自然則不如
是其多憂矣多憂者言為仁義者多憂勞也莊子之為
此言自孔孟而上以至堯舜禹湯皆在譏侮之數

且夫駢於拇者決之則泣枝於手者齧之則啼二者或有
餘於數或不足於數其於憂一也今世之仁人蒿目而憂
世之患不仁之人決性命之情而饗貴富故意仁義其非
人情乎自三代以下者天下何其囂囂也

手足之駢枝雖皆為病而不可強去之去之則為憂苦
矣枝多一指也故曰有餘於數駢合二指而不可分故
曰不足於數蒿目者半閉其目也欲閉而不閉則其睫
蒙茸然故曰蒿目蒿者蓬蒿之蒿也蒿目有獨坐憂愁
之意此莊子下字處憂世之患而自勞仁人也貪饗貴
富而破壞其性情不仁之人也二者皆為自苦故並言
之又嘆曰仁義非人情乎言如此看來仁義信非出於
本然也囂囂嘈雜也三代而下此說盛行何其嘈雜也

且夫待鈎繩規矩而正者是削其性也待繩約膠漆而固
者是侵其德也屈折禮樂响俞仁義以慰天下之心者此
失其常然也

性自然也德自得於天也皆非人力所為若必待修為而後正則是自戕賊矣鈎繩繩約膠膝皆修為之喻也侵削戕賊也固定也屈折其身以為禮樂响俞其言以為仁義欲以此慰天下之心皆是失其本然之理故曰失其常然响俞猶嫗撫也

天下有常然常然者曲者不以鈎直者不以繩圓者不以規方者不以矩附離不以膠漆約束不以纆索故天下誘然皆生而不知其所以生同焉皆得而不知其所以得故古今不二不可虧也則仁義又奚連連如膠漆纆索而遊乎道德之間為哉使天下惑也

常然以下數語與合者不為駢枝者不為跂以下意同曲直方圓或附或離或加約束皆當出於自然而不用人力則為正理誘與莠同莠然而生者孰生之物之所同者孰與之皆自然也故曰不知其所生不知其所得

古今不二者一也不可虧者亘古窮今不加損也連連不已也膠漆自固泥也纆索自拘束也離性以為仁義為之不已則固泥拘束何以遊於道德之門徒以惑天下也莊子與孟子同時孟子專言仁義莊子專言道德故其書專抑仁義而談自然亦有高妙處但言語多過當大抵莊子之所言仁義其字義本與孟子不同讀者當知自分別可也

夫小惑易方大惑易性何以知其然邪自虞氏招仁義以撓天下也天下莫不奔命於仁義是非以仁義易其性與故嘗試論之自三代以下者天下莫不以物易其性矣小人則以身殉利士則以身殉名大夫則以身殉家聖人則以身殉天下故此數子者事業不同名聲異號其於傷性以身為殉一也

惑迷也方四方也小迷則東西南北易位矣大迷則失天地之性矣借上句以形下句招猶今人言招牌也立仁義之名以撓亂天下使天下之人皆趨於仁義奔命為其所使而奔趨也知仁義而不知道德是以外物易其性也在小人則殉利在君子則殉名卿大夫則殉其家人主則殉天下殉從也忘其身以從之曰殉若莊子之意則天下國家名利均為外物也以天下國家與名利並言以小抑大以下抑高此書之中大抵如此數子者指上言聖人大夫士小人也事業名聲雖不同而其忘身傷性則一此皆殉物之失也

臧與穀二人相與牧羊而俱亡其羊問臧奚事則挾筴讀書問穀奚事則博塞以遊二人者事業不同其於亡羊均也伯夷死名於首陽之下盜跖死利於東陵之上二人者所死不同其於殘生傷性均也奚必伯夷之是而盜跖之非乎天下盡殉也彼其所殉仁義也則俗謂之君子其所

殉貨財也則俗謂之小人其殉一也則有君子焉有小人焉若其殘生損性則盜跖亦伯夷已又惡取君子小人於其間哉

博塞讀書二事之美惡不同而亡羊則均此喻最佳挾筴即執卷也投瓊曰博不投瓊曰塞瓊猶今骰子也亦曰齒亦曰目塞與賽同伯夷盜跖莊子豈不知其賢否特借此以立言此皆是其過當處君子小人雖異而殘生損性則一其意主於譏君子故借小人以形之是皆以小抑大以下抑高之意也

且夫屬其性乎仁義者雖通如曾史非吾所謂臧也屬其性於五味雖通如俞兒非吾所謂臧也屬其性乎五聲雖通如師曠非吾所謂聰也屬其性乎五色雖通如離朱非吾所謂明也吾所謂臧非仁義之謂也臧於其德而已矣

吾所謂臧者非所謂仁義之謂也任其性命之情而已矣
 吾所謂聰者非謂其聞彼也自聞而已矣吾所謂明者非
 謂其見彼也自見而已矣夫不自見而見彼不自得而得
 彼者是得人之得而不自得其得者也適人之適而不自
 適其適者也夫適人之適而不自適其適雖盜跖與伯夷
 是同為淫僻也余愧乎道德是以上不敢為仁義之操而
 下不敢為淫僻之行也

屬性猶言留意也曾曾子也諱參史子魚也名鯁以俞
 兒師曠離朱而比曾史亦是以下抑高之意臧善也言
 雖如此此非吾所善也善於其德任其性命之情即順自
 然也此數語之中如所謂聰者非謂其聞彼也自聞而
 已矣所謂明者非謂其見彼也自見而已矣一大藏經
 不過此意安得此語若此等語皆其獨到不可及處這

一彼字不是輕可下得禪家所謂狂犬逐塊所謂幻花
 又在幻果便是這箇彼字自得其得自適其適即自見
 自悟也大抵分別本心與外物耳不得其本心而馳騫
 於外則皆為淫僻矣自聞自見若在吾書即論語所謂
 默而識之易所謂默而成之不言而信孟子所謂施於
 四體不言而喻伊川春秋傳序曰優游涵泳默識心通
 皆是此意但說得平易爾晦翁懲象山之學謂江西學
 者皆揚眉瞬目自說悟道深詆而力闢之故論語集解
 以識音志曰默而記之爾孟子不言而喻亦曰不待人
 言而自喻不肯說到頓悟處蓋有所懲而然非語孟二
 書之本旨也若以伊川默識心通之語觀之豈得音志
 乎然學道者若用功之時常有等待通悟之心此尤不
 可所謂執迷待悟則隔須彌山矣頓漸自有二機不可
 謂有漸而無頓亦不必人人皆自頓悟得之仲弓之持
 敬漸也顏子之克己復禮頓也一日而得之非頓悟而何
 復禮天下歸仁焉仁何物也一日而得之非頓悟而何
 看此數語先提起一句曰克己復禮為仁乃曰一日克
 己復禮天下歸仁焉又曰為仁由己由人乎哉語勢起
 伏便與禪家答話一同子細吟玩方見其味顏子既於
 言下領略乃曰請問其目此即禪家所謂如何保任之

俞廷

時四非四勿便是盡心知性知天之下繼以存心養性
事天脩身俟命之事也其曰為仁由己即禪家所謂此
事別人着力不得也先師嘗曰佛書最好證吾書證則
易曉也上不敢為仁義之操是為善無近名也下不敢
為淫僻之行是為惡無近刑也道德自然也余恐有愧
於道德雖不為近刑之事亦不為近名之事近名則非
自然矣故曰余愧乎道德是以上不敢為仁義之操而
下不敢為淫僻之行也觀莊子此語何嘗不正心脩身
其戲侮堯舜夫子曾史伯夷初非實論特鼓舞其筆端
而已塘東劉叔平向作莊騷同工異曲論曰莊周憤悱
之雄也樂軒先生甚取此語看來莊子亦是憤世疾邪
而後著此書其見既高其筆又奇所以有過當處太史
公謂其善屬書離辭指事類情用剝剝儒墨雖當世宿
學不能自解免也其言沈洋自恣以適已此數句真道
子著莊

莊子外篇馬蹄第九

馬蹄可以踐霜雪毛可以禦風寒齧草飲水翹足而陸此

馬之真性也雖有義臺路寢無所用之及至伯樂曰我善
治馬燒之剔之刻之雒之連之以羈馬編之以阜棧馬之
死者十二三矣飢之渴之馳之驟之整之齊之前有楸飾
之患而後有鞭筴之威而馬之死者已過半矣

此段言外物能為身累之意翹足而陸者凡馬立時其
蹄必有跋起者也此是下句處義臺路寢即是王者之
宮室也義者養也居移氣養移體之地必當時有此二
字燒剔治馬蹄也刻削也亦削其蹄也雒之籠絡也羈
絡其頭也鬻絳其足也今所謂前鞅後鞅也連列之也
阜棧槽檣也衆馬列於其間也整齊排布行列也楸飾
也飾鑣纓在頷下故曰前有楸飾之患馬制於人而不
得自樂其樂所以死者多矣即元龜與其曳尾於泥中
意同但其間下數箇之字與前言二三後言過半文字
華密如美錦然古今多少筆法自此萌芽而出或曰外
篇文粗誤矣

陶者曰我善治埴圓者中規方者中矩匠人曰我善治木曲者中鈎直者應繩夫埴木之性豈欲中規矩鈎繩哉然且世世稱之曰伯樂善治馬而陶匠善治埴木此亦治天下者之過也

陶泥匠也匠木作也泥之與木皆人造之而成器亦猶馬之被燒剔刻雖馳驟整齊也豈不失止木之性人皆以伯樂陶匠為能亦猶泰氏而下以治天下為能也即前篇仁義非人情之意此三數行之文其意不過如此但文字精好

吾意善治天下者不然彼民有常性織而衣耕而食是謂同德一而不黨命曰天放故至德之世其行填填其視顛顛當是時也山無蹊隧澤無舟梁萬物羣生連屬其鄉禽

獸成羣草木遂長是故禽獸可係羈而遊鳥鵲之巢可攀援而闕夫至德之世同與禽獸居族與萬物並惡乎知君子小人哉同于無知其德不離同乎無欲是謂素樸素樸而民性得矣

同德者得之於天者同然也人之生也各業其生或耕或織皆是自然天機故曰常性常性者即前篇所謂常然也黨偏也倚也純一而無所偏倚放肆自樂於自然之中故曰一而不黨命曰天放命曰猶言謂之也齊物論之天行天鈞天遊與此天放皆是莊子做此名字以形容自然之樂至德之世言上古也填填滿足之貌顛顛直視之貌形容其人樸拙無心之意又就其野徐徐其覺于于應帝王中翻出此語山無蹊隧路未通也澤無舟梁水路未通也人各隨其鄉而居自為連屬一鄉之中自有長幼上下相連屬也禽獸羣居深山去人尚遠無害也者草木各遂其生長未有斧斤之禍也羈係禽獸而遊攀引鵲巢而闕人與物相忘也東坡雜說有

少時所居書室鳥雀巢於低枝鵲花鳳四五日至頗與此處相似見詩集二十八卷異鵲詩注以此觀之上古之時必是如此禽獸可與同居萬物可與同聚又安有君子小人之分族聚也並同也無知不識不知也無欲純乎天理也舉世皆然故曰同乎無欲不離渾全也素樸純質也當此之時各得其自然之樂故曰素樸而民性得矣其德不離是謂素樸兩句相因而下句只用素樸二字接過古文法也今人之文更無此等法度

及至聖人蹙蹙為仁蹠蹠為義而天下始疑矣澶漫為樂摘僻為禮而天下始分矣故純樸不殘孰為犧樽白玉不毀孰為珪璋道德不廢安取仁義性情不離安用禮樂五色不亂孰為文采五聲不亂孰應六律夫殘樸以為器工匠之罪也毀道德以為仁義聖人之過也

前言及至伯樂此言及至聖人以下段應上段也蹙蹙勉強而行之貌蹠蹠行立不安之貌澶漫即汗漫也流

蕩之意摘僻用手足之貌辭合作擗向音弊是也此又是自屈折禮樂响俞仁義中翻出言雖不經其文亦竒始分者言其心迹始分矣分則不純一矣如此分字皆是下得好處樽刻木而為之故曰純樸不殘孰為犧樽玉不琢不成器故曰白玉不毀孰為珪璋道德自然也莊子以仁義為外故曰道德不廢安取仁義性情固有也莊子以禮樂為強世故曰情性不離安用禮樂若孟子曰節文斯二者樂斯二者聖賢之言也此書禮樂仁義字義不同並以為外物矣文采亂五色六律亂五聲皆是用人力非自然之喻工匠之罪聖人之過兩句此上文結語也

夫馬陸居則食草飲水喜則交頸相靡怒則分背相蹠馬知已此矣夫加之以衡扼齊之以月題而馬知介倪闔扼驚曼詭銜竊轡故馬之知而能至盜者伯樂之罪也夫赫胥氏之時民居不知所為行不知所之含哺而熙鼓腹而

遊民能已此矣及至聖人屈折禮樂以匡天下之形縣跂
仁義以慰天下之心而民乃始蹠跂好知爭歸於利不可
止也此亦聖人之過也

此一段又是把前頭許多說話翻做數行中間添得幾
句愈是奇特喜則交頸相靡怒則分背相蹠分明是一
箇畫馬圖也相靡相摩擦也看他交頸分背字下得如
何衡扼車上之物扼軸也月題今所謂額鏡也介倪介
獨也獨立而睥睨怒之狀也闐扼曲頸而扼拒也不受
銜絡之意驚猛也曼突也不受羈勒而相抵突之狀詭
設計也竊潛地也詭計以入銜潛竊以加轡皆是悍驚
不受調服故御轡之時如此費計較也與人抗敵者曰
盜馬之知至於抗敵人伯樂使之也若無衡扼銜轡之
事則馬自馬人自人豈見其介倪闐扼之態哉民能已
此者言民之所為止於如此也匡正也以禮樂而正人
之形以仁義而慰人之心此聖人作而後有此上古本
無之縣跂高揭而提起之意蹠跂不自安也好知爭利
比馬之詭銜竊轡也內篇外篇正與左傳國語相似皆

出一手做了左傳又成國語其
子此篇便是箇長枝大葉處故或者以為非莊子所
却不然

莊子卷三終

新編通志卷之三

三



